

Sonny Tabor esas kaptita inter la duopligata tondro di

JUSTA PAFILI E NEYUSTA PAFISTI



da **WARD M. STEVENS**

autoro di
**SONNY TABOR—MORTINTA O
VIVANTA,
SONNY TABOR SUR LA NIVOZA
VOYO,
edc.**

Unesme publisita 9 januaro 1943
en *Wild West Weekly*.

Ica tradukuro
Creative Commons 2023 by Brian E. Drake
Attribution-NonCommercial-ShareAlike 4.0
Unported International

The Oxford Rationalist
56 Albany Street
Oxford, NY 13830 USA
(607) 843-2636
brian.eric.drake@gmail.com

JUSTA PAFILI E NEYUSTA PAFISTI

DA WARD M. STEVENS
(PAUL S. POWERS)

TRADUKITA DA BRIAN E. DRAKE

CHAPITRO 1.

MILITO-HALTO FINAS.

TO ESIS BITRA DOZO ESAR GLUTATA dal autoritatozi di Phoenix, ma li mustis facar lo. L'urbo-marshalo e quar de lua sublietnanti stacis sur la chefa strado kun plura sub-usheri di Marikopa-statdistrikto ed iracoze ma senpove spektis dum ke preterpasante kavalkis la maxim serchata proskriptitulo en Arizona. Il esis Sonny Tabor!

L'autoritatozi preske herisesis per pafili; esis granda di-limo, ma li tote ne darfis agar. Tabor mem impertinente e sensucie agitis un manuo dum preterpasar! E la autoritatozi nur povis mastikar sua labii e blasfemar.

La marshalo extensis un manuo—ne por sua pafilo, ma por sua horlojo. “Quar kloki,” il grunachis. “E ni ne darfas pozar un

manuo adsur ta impertinenta yunulo ante noktomezo.”

“E lore ube lu esos?” Un del altri levis sua shultri. “Ecepte ke, tamen, lu sucesos negociar. Ka tu opinionas ke lu sucesos?”

“Me kelke supozas ke yes, lu sucesos,” la marshalo respondis. “Lu es tam homala kam irgu, e lu volas vivar. Lu devas savar ke lu aceptas morto se lu refuzus.”

“Ulfoye me opinionas ke lu *ne* es homala,” deputito dicis dum spektar la yuna proskriptito sur la nigre e blanke makulizita kavaletto til ke il pasis ultre vido. “Ta ridetanta mortigero faligis plu multa viri kam skolopendro havas gambi. E la maniero per qua lu eskapis karceri e la kordo—”

“Ultempe lu eroros—por sempre,” esis la dezirema dicajo da altru de la viri di la marshalo. “Kande lu eroros, me volas partoprenar—sisamil-e-kinacent dolari, ya, mortinta o vivanta, to es bona premio.”

Ecepte l’autoritatozi, qui informesis pri la vizito di Tabor, kelki en la turboza stradi di Phoenix atencis la notoracha fugero per plu kam sensucia regardeto, nam il aspektis preske same kam la dekedui de kavalkanti qui turbe promenis l’urbo. Il forsan esus bovgardisto tempale chomanta; sen

pekunio, probable, ma ne multe suciante. Tabor esis kelke min kam mezvalore altstatura ed, ecepte ilua povoza brakii e larja shultri, esis gracile formacata. Ilua rurala vesti—getri quale la ali di vespertilio, ek bruna ledro, blua kotonaji, flanela kamizo, e kremea Stetson-chapelego—esis neta, ma tre uzita. Nur vulgara bovgardisto, opinionis preske omnu regardante il. Arizona esis plena de tala homi.

Ta dio esis kelke specala dio en la chef-urbo, e quankam la banki ed ula komerceyi klozesis, la drinkeyi traktis multa klienti. La pueri qui vendis jurnali anke ganis, e sur lia jurnali esis granda nigra kap-tituli:

NOVA GUVERNISTO HODIE ASUMAS OFICO!

SAM FRAZER KOMENCAS POS GUVERNALA CHANJO

Pos vinkar olima guvernisto John Meredith per mikra nombro de voti en la recenta voto, Samuel B. Frazer, olima bov-farmisto, hodie dukteskas la guvernerio di Arizona.

La publika ceremonii esis longatempe ante lore finigita, ma granda nombro de kabrioleti, fiakri, e selizita kavali ankore restis proxim la Stato-domo kande Tabor atingis ol. Il trovis vakua spaco ye un del eleganta fera reli, pazis ek l'estribo e forbroshis la maxim granda parto del alkoloida polvo de sua vesti. Nam lu facis nekustumala vizito.

“Me iras adinter l’importantuli, Fardo,” il dicis, ed afecionoze frapetis la makulizita kavalo. “Me balde rivenos—me supozas.”

Il lejere kuris adsupre alonge l’eskalero qua duktis aden la granda griza edificio, lua sporni sonante quale klosi. En l’alta pordeyo oficio bruske haltigis il.

“Tu ne darfas enirar adibe, yuno. La nova guvernisto havas privata kunveno en sua kontoro. On bezonas rendevuo.”

La homo desestimante regardis la vizitanto. Sonny semblis esar mem plu yuna kam sua evo, ergo sua surnomacho. Ilua facila rideto ed ilua inocenta blua okuli, mem la foseto qua markizis un sunbrulita vango, kontribuis ad ilua aspekto pueratre nenociva. La lakeo di la Stato-domo surprizesus se il komprenus to quon esis dop ta milda okuli, o se il savus ke ta “foseto” esis cikatro pro kuglo.

“Guvernisto Frazer asignis rendevuo kun me,” kalme dicis la proskriptito. “Mea nomo esas Tabor.”

L’oficiro laute glutegis, la guturo strangulata. Paleskante, il rapide retroe pavis ek la voyo di la vizitanto. Il semblis unesmafoye vidar la mortiganta armaro di Tabor—la perfekte parigita pafili, blue nigra e briletanta, en la basa pistoluyi; la du zoni briletanta pro latuna kartochi, qui quale krotali cirkumiris la magra hanchi di Tabor. Kande la viro rekuperis sua voco, ilua politeso esis preske tro granda.

“Pardonez me, sioro, me ... me ne savis,” il balbutis. “Vu trovez l’ecelenco supre en Chambro 17. Bonvole irez adsupre, sioro.”

Sonny Tabor agreable dankis il, lore acensis la kurvita eskalero. Ilua pazi kelkete lenteskis dum atingar la granda supra koridoro, nam ilua spirito tristeskis. Lastafoye venante, il vizitabis altra guvernisto, viro qua esabis amiko. Ma nova guvernisto adhike advokabis il, grantante imuneso de aresto dum duadek-e-quar hori. Pro qua skopo?

Il nur konjektis—kun presento di desfortuno. Il expektis ke il ne advokesis por audar bona novajo. Il hezitis veninte a la juste numerizita pordo. Lore il turnis la

pezoza bronza pordo-butono, apertis la pordo ed eniris.

LA CHAMBRO ESIS GRANDA, bone lumizita, ed havis senmakula blanka muri gipsizita. Sidante an longa tablo meze di la chambro esis la guvernisto e plura konsilanti, la maxim multa de qui fumagis sigari. Ol esis solena grupo de severa vizaji, e la nova guvernisto esis partikulare severa. Sonny quik remarkis il—viro havanta streta mandibulo e salianta brovo, l'okuli klara e kolda.

La fugero kurte anuncis su. “Mea nomo es Tabor. Ka vi jentilhomi deziras konversar?”

L'amiki di la guvernisto severe regardegis—quale se li expektas ke la proskriptito portez korni e kaudo—ma guvernisto Frazer kalme gestis a vakua sidilo opozanta su. Lore il prenis fasko de dokumenti e foliumis oli.

“Yes, me grantis a tu ca kurta amnestio por ula sorto de interkonsento. La tua esas un de la maxim mala registri di kriministi en la Teritorio, yunulo, ma me kredas ye yusteso mem por tala quala tu.”

“Me dankas vu, sioro,” sardonike dicis la proskriptito. “Me askoltas.”

“Tu olim havis oportuneso, Tabor, e tu forjetis ol.” Frazer frunsis la brovo, itere regardetis la dokumenti. “L’olima guvernisto esis sat nesaja grantar pardono a tu, mem nominis tu al Arizona-Guardo*. Tu prevarikis per itere divenar kriministo.”

Redesko obskurigis la sun-brulita vizajo di Tabor. Lore esis nula motivo restar silencoza. “Me celate laboris dum ta tota tempo por guvernisto Meredith. Mem la Guardani ipsa ne savis ke me laboris por l’autoritatozi, ma to esas omnakaze vera.”

La mandibulo di Frazer tenseskis. “Nula pruvo pri lo esas en la registri—e pro ke Meredith repozas en Kalifornia, me ne povas kontrolar ta aserto.” Il e l’altri nekredeme mokridetis. “Mem se to quon tu dicas esus vera, Tabor,” guvernisto Frazer duris parolar, “to nun ne importas. Ca nova administraro ne tale facos! Tu plurafoye kondamnesis pro ocido e se yusteso facesus, tu esus pendigita. Ma me invitis tu adhike por ofrar propozo a tu, e yen ta propozo. Se tu cedos su al autoritatozi sen plusa perturbo, me atencos ke la morto-puniso ne aplikesos. La judiko esos tota vivo en karcero.”

* La stat-policistaro en l’Usana Westo.

Sonny Tabor restis taceme. Il suafoye astonesis. Ka Frazer supozas ke il cedos su per tala kondiciono? Koram tala selekto, esus plu bona esar pendigita e quik finigita.

Ke Sonny multafoye koaktesis mortigar esis vera de pos ke il unesmafoye esis proskriptita, pro nula kulpo, dum sua adolescenteso. Ma omnafoye mortigante, to esis por defensar sua propra vivo o por protektar altri de morto. Quankam il multafoye havis l'oportuneso, il nultempe mortigabis oficeru por eskapar kapto.

“Se tu donos a me tota vivo en la karcero,” il lente dicis, “tu komence mustas kaptar me.”

La sigaro di Frazer ne plus fumis ed il ri-acendis ol. “Sen ke tu aceptos mea propozo, Tabor, tu pendigesos se vivante kaptota; takaze tu ne ganos vivo-kondamno. Audez to quon me facos, nur por montrar ke me agas juste. Se tu hodie cedos tu, me sorgos ke tu ne esos enkarcerigata dum plu kam dek-e-kin yari.”

Ye ta “indulgemeso” di la guvernisto venis indignoza snorto de un de la konsilanti. Il esis imensa viro obeza, chere vestizita. Ilua ronda vizajo, rozea e sudorifanta, tremis quale jeleo-amaso dum ke il protestis la nova propozo da Frazer.

Sonny vidabis l'imajo di ta homo en la jurnali, e rikonocis il kom Lorenzo Greene, financisto e politikisto, posedanto di multa banki tra la Sud-westo.

"Sam, me objeccionas tua ofro di dek-e-kin yari por ca ... ca kriministo e mortiganto!" barbuliis Greene. "Tala lejera kondamno ne deskurajigus la bandito-pesto qua furtis mili de dolari de mea banki! Arizona esas la kruco-voyo por l'ocidanti di sis State e du nazioni, e tala homi ne esez traktata per mola manui. Se tala notoracha homo quala Tabor tante lejere traktesus—"

"Forsan tu es justa, Greene," dicis Frazer. "Ma ton me propozis, e ton me propozas. Nu, Tabor, quale tu decidas?"

Sonny lente staceskis e ferme metis sua Stetson. Dum multa monati il riskabis sua vivo por yusteso, e por la kauzo quan il opinionis esar justa. Nun il ofresas sua rekompensu—la karcero. To ne esis la kulpo di guvernisto Meredith, nam Meredith sempre yuste traktabis il. Nek mem la kulpo di Frazer, partikulare. Nam la kriminala registro di Sonny esis, pos omno, reda e nigra per sango e fumo. Me il facabis nulo shaminda.

"Nu, parolez!" nepaciente imperis guvernisto Frazer dum ke Sonny ankore ne

parolis. “Me volas respondo, yes o no. Respondo komprenebla.”

Lore ulo eventis! La du Colt-revolveri di Tabor saltis ek lia pistoluyi quale se tirata da nevidebla kordeti, nam la movo di la manui di la proskriptito esis tro rapida por l’okuli. E li venis sputante fairo e fumo! La chambro shancelis sub la salveo di multa explozi, l’una venante tante rapide pos l’altra ke li esas un duriva tondro. Ante ke la guvernisto e sua amiki povus saltar adsub la tablo, la pafado cesis. E Sonny Tabor tranquile ekpazis.

“Por amo di— Ka—ka lu ne pafis irgu de ni, ka yes?” Lorenzo Greene anhelis, la vizajo min rozea kam antee. “Quon ta dementa proskriptito intencis per—”

“Regardez la muro,” Frazer stuporate dicis.

La dek-e-du kugli di Tabor markis shablono en la blanka gipso di la kontoro di la guvernisto: N O.

La vorto kuglo-skribita esis tre klara e lektelebla.

Frazer havis sua respondo. Respondo komprenebla!

KONCIANTE KE OMNA SUA MOVI SPEKTESAS, e ke la policisti di Phoenix esforcos spektar il

til pos noktomezo, Sonny Tabor manjis sua dineo, e pose kavalkis ek l'urbo vers la sudo.

On esforcis sequar il, ma en la montoza dezerto il facile evitis la persequo. Tam balde kam nokteskis, il turnis su rekte aden Phoenix. Il esis ferma kredanto ye facar lo ne-expektata.

“Ni itere es strigi, yes ya, Fardo,” il rezolveme dicis. “Ma me supozas, ke ni tale kustumas lo.”

Il kelke shamis pro la pafado en la kontoro di la guvernisto, nam il ne-ofte talmaniere ostentis. Il nur iraceskabis, e to anke esas rara evento.

“E me anke ne havas sparebla kartochi,” il regretante pensis kande la lumizili dil urbo itere aparis avan il.

Per la laterala stradi il kavalkis al fervoyeyo. Bruisoza lokomotivo garis adavane e retroe, e kargo-treno charjesis. Vartante til ke il esas certa ke on ne vidas, la fugero celis Fardo dop l'aquo-cisterno, pose marchis al boveyo por serchar gren-parieto. Trovinte un de oli, il klovagis plura planki trans ol kom taki, uzante la kroso di un de sua pafili kom martelo.

Pose il prudente proximeskis a la treno ye la latero for la staciono, e duktis Fardo

tra l'obskureso. Il forsis la pordo di vagono, e pro ke ol havis nur kelka buxi ye un extremajo, il duktis la kavalo aden ol uzante la gren-parieto kom rampo. To ne esis l'unesma foyo ke il e la kavalo tale voyajabis—pro to la policisti tante ofte konfuzigesis. On ne surprizesis ke, pos raportar ke la proskriptito evidente voyajis plura centi de milii dum un dio, li asertis ke o Sonny o Fardo—o li amba—esas vera diablo!

Sonny apene klozabis la glitanta pordo di al vagono kande, kun spasma e snorto ek la lokomotivo, la treno moveskis, la kuplili kliktis quale longa rango de falanta domino-stoni.

Subite la hari di la proskriptito tenseskis sur ilua kranio-pelo. De ula loko en la densa obskureso di la movanta vagono venis lauta e resonanta rido. Il ne esas sola!

CHAPITRO II.

Ex-karcerano.

LA MANUO DI TABOR MOVIS for ilua pistoluyo, nam la ridado duris ed en ol esis autentika gayeso. Ol venis de dop la amaso de buxi.

“To es quon me nomas vagar luxoze!”
dicis la nevidata kunvoyajanto.
“Unesmafoye me vidis ke vaganto furtas veturveho por sua kavalo! Me nomas lo tre bel. Privat vagono por homo e bestio. Ma vartez til ke me acendez lumo.”

Alumeto flagris e la parolanto reptis ek sua celo-loko, acendis kurta kandelo e glutinis ol adsur buxo per olua propra graso. Il esis altstatura viro evanta cirkume duadek-e-sis, ma ilua forta inklino e hararo blanka ye la tempori igis ke il aspektez multe plu evoza. Il weris chipa e stofacha vestaro, ma malgre ilua paleso, Sonny komprenis ke il ne esas Estano. La viro ne

ganabis ta arkatra gambi per eskartar oli cirkum baskul-stuli!

“Bonveno a mea privat veturo,” la nekonocata dicis, ankore guturo-ridante. “Ed anke bonveno a tua kavalo. Tre forte aspektant kavalo, ka ne?” Il cesis ridar ed ilua okuli soleneskis. “Kin yari pasis de pos ke me sidis en selo, e semblas esir kinadek! Me avide itere kavalkus.”

Sonny komprenis ke nur un kozo deturnas bovgardisto de kavalo dum kin yari. La viro regardis il e mikre asentis per kapsigno.

“Yes, me jus ekiris la karcero,” il akute dicis. “Tu vidas per ca gratuit vestaro ke me ne eskapis. Me satisfacis mea kondamno. Hom-ocido. Mea nomo es Harry Stone. Do, tu ne bezonas multe questionar.”

“Me ne questionas. Mea nomo es Tabor.”

Kompreno lumizis la griza vizajo di Stone, ed ilua mieno bitreskis e sardonikeskis. “Me hazarde mortigas viro dum lukto e satisfacas la kondamno. Tu mortigas dekedui, segun to quon me audis, e tu es libera.”

“Se tu satisfacis tua debo a socio, tu es plu libera kam me,” Tabor nelaute dicis. “Me esos libera kande me es en la tombo.”

Harry Stone palpebragis dum instanto e semblis pensar. “Me regretas, Tabor,” il dicis, ed extensis un manuo. “Me sempre audis de la pueri che la Fera Klozajo ke tu es honest pafisto. Tu ne havas irga nutrivo, ka ne?” Il ridetis. “Me havis nula manjajo de pos la matino.”

Sonny havis poka provizuri en la posho di sua selo, e balde Stone gratitudoze mordis granda peco de sikigita cervo-karno. Ante lore, la rulsoneganta kargo-treno livabis Phoenix for dop ol e reptis adnordweste tra la stel-lumizita dezerto.

“Du de ta buxi ibe markizesas *bidonizita sardini*,” Stone dicis dum mastikar. “Me esis tante hungroza ke me apertis un de li. Regardez ol.”

Kurioza, Sonny exploris l’apertita buxo per la vaciletanta lumo di la kandelo. “Ho, ol es plena de municiono—.45- e .30-30-kartochi,” il surprizate dicis. “Ne tro nutranta nutrivi. Ma pro quo li tale markizesas, me es kurioza?”

“Tu remarkez ke li konsignesas a William Lashly, 7Y7-domeno, Monto-fonti,” grunachis Stone. “Lu es mea vicino—posedas grand domeno apud mea mikra domeneto. Pro lu me iris al karcero. Me

mustis faligar un de lua pafisti. Koincido, ka ne?”

“Lu evidente es ula jokanto, por tale markizar la kargajo.”

“La humuro di Lashly es tre praktikema,” dicis Harry Stone. “Lu nur ne volas ke homi saveskez quanta municioni sua grupacho uzas.”

“Do tu havas bov-domeno,” Tabor penseme dicis. “Tu ne bezonas bona helpanto, ka yes? Ma vartez un instanto, to ne es posibla. Tu volas restar neperturbata, e se tu engajus me tu esus kulpoza pri helpar proskriptito. Ne plus pensez pri lo.”

Harry Stone ya pensis pokatempe, pose ridetis. “Me riskos lo. Li ne povas pruvar ke me savas ta quan tu es, me supozas. Segun la publiko tu esos—nu, Frank Jonson es tam bona kam irg altra nomo.” Il hezitis dum instanto, rekte regardis la proskriptito. “Tu savas, ka ne, ke me ne engajas tu kom pafisto? Tu advere volas facar honest domen-laboro?”

Sonny respondis ke ton il exakte volas facar.

La proskriptito intencis livar la kargo-treno ye olua halto ante jornesko, ma il lore projetis altre por fitar la projeto di Harry

Stone. Ol esis l'exakta oportunajon dezirata. Segun Harry, ilua mikra Cirklo-X domeno esas en solitara loko nefrequentata. Havante fortune, il povus longatempe celar su ibe e laborar per to quon il amas: kavalkar en la dezerto.

Harry heredabis la domeno de sua mortinta genitori, ed il sucesis til ke tragedio frapis il. Lashly, la posedanto di la 7Y7, dezirabis komprar la domeno por fraciono di olua vera valoro. Il tandem sendis sua laboristestro ad Harry, e dum la sequanta lukto Harry mortigis la viro por defensar su. Lashly certigis, tamen, ke la posedanto di la Cirklo-X kondamnesez pro hom-ocido. Il mem esforcis igar ke la akuzo esez ocido dil unesma grado.

“Ma me ne rankoras, partikulare—adminime, me ton esforcas,” dicis Harry Stone. “Me nur deziras ke on ne perturbez me.”

Il dicis a Sonny ke ilua domeno ne okupesis dum ke il esis enkarcerigita, nam il refuzis lugar ol ad irgu. Il vendabis sua bovaro e livis sat multa pekunio en la banko di Monto-fonti por pagar l'imposti. Do il e Sonny komencos de nulo.

Dum la maxim granda parto di la sequanta dio li restis en la lente movanta

kargo-treno. Multa kurta halti eventis, ma nula trenisto regardis aden la vagono. Harry dicis ke li ne mustas irar tam fore kam Monto-fonti; li livos la treno ye Chiko, mikra vilajo dek milii de ol. Dume la karaktero di la peizajo chanjis. Tra fendureto en la pordo Sonny spektis la forrulanta splendida peizajo, vidis la vasta oceani de yuki, *Cylindropuntia*, e *Prosopis* cedar su a cedri e pini. De pos la hiera nokto, li klimabis mili de futi adsuper la sika dezerto.

“Es bona tempo por preparar mea rampo por l’ekiro di Fardo, me supozas,” Sonny dicis, kande la treno lenteskis por la staciono ye Chiko.

Kin minuti plu tarde la frenisto, marchante vers la lokomotivo del ultima vagono, subite haltis e frotis sua okuli reda pro cindri. De vagono il supozas ke il vidas du viri *e kavalo* sensucie ekirar. La viziono semblis desaparar aden l’apuda busharo.

“Saltanta koboldi!” la frenisto grunachis, e frakasis sua wiskio-botelo an la roto dil vagono. “Me vidas iluzioni! Nultempe itere! Yen la finala foyo ke me drinkas dum laborar!”

CHAPITRO III.

La Domeno fantom- frequentata

EN LA MIKRA BUTIKO DI CHIKO, Harry Stone kompris nutrivi, uzante parto di la dek dolari donita ad il liberigata de la karcero. Lore li iris vers la Cirklo-X, singlafoye kavalkante o marchante alonge la voyeti eskarpa e danjeroza. Ante ke li vidis la domo di la domeno, la suno kushabis su dop rango de brilante skarлата nubi e la dio obskureskis.

Splendida pasturo-tereno cirkondis la domo di la Cirklo-X, ma ol esis ulmaniere tenebroza e depresiva. Tempo e la vetero ne benigne traktabis ol; la fardo falis de la muri, e granda herbachi kreskis en la gazono. Avan la fairatre reda dopajo di la sun-kusho, l'edificio aspektis minacante e stranje sole.

“Ol plu bone aspektos pos kelka dii, kande ni reparabos ol,” dicis Harry Stone per esforco esar gaya.

Fardo donesis aquo e lojigesis en l’inklinanta stableto. Pose la du homi eniris la domo; Harry apertis ol per rustoza klefo quan il celabis sub la portiko kin yari ante lore. Li eniris tra inkluzita laterala portiko, o galerio. Pose la posedanto di la Cirklo-X trovis keroseno ankore en jaro, e plenigis ed acendis la lampo. Omno odoris de polvo e longa ne-uzo, e li apertis la fenestri por aerizar ol.

“Exakte quale me livis ol—esis nulo valorant forse o furto,” dicis Harry Stone pos inspektar omno. “Me havas bon pafilo celit sub la pavimento.”

Li acendis fairo en la rustoza koqueyo-furnelo, e pos varma repasto li amba plu bone standis. Harry fortiris planko di la pavimento e desvolvis l’oleizita silkajo de Colt-.45 havanta ivora kroso. Ol standis perfekte.

“Me esperas ke me nultempe bezonos uzar ol,” l’ex-kondamnito murmuris. “Me nultempe pafis ulu. No,” il dicis pos regardo de Sonny, “ta tale nomat hom-ocido ne-intencat, me facis ol per bucho-kultelo.”

Tabor evidente aspektis shokate, nam il hastoze explikis. “To eventis ibe, en la galerio. Me pendigabis shinko ibe, e me tranchis loncho ante dormeskar. Me esis nur mi-vestizit, ne weris mea pafilo, kande ta Haggerty-homo atakis me. Il ektirante sua pafili, me frapis per mea kultelo e tranchis lu.” La blanka vizajo di Harry nerveze spasmis pro la memoro. “Me nultempe oblivios lo—lo esis horrorind. Ante kin minuti lu esis mortint, malgre mea esforci.”

“Ula kozi viro devas *esforcar* obliviar, e tala kozo es un de li,” konsilis Sonny Tabor, e por deturnar la mento di sua amiko, il paroleskis pri la domeno e projekti por la futuro.

Harry acendis sigareto e balde standis plu bone. Il tensis l’antiqua ligna horlojo, trovis polvoza lud-karti, e li pasis plura hori per plear “pitch”. Tandem li enlitigis su. Plura liteti esis en la lit-chambro, e Sonny desvolvis sua “soogan”[†] adsur un apud fenestro.

Quankam fatigita, il ne facile dormeskis. Harry Stone anke esis destranquila, nam Sonny audis ke il agitas e movas su. Extere esis tre obskura, nula luno e nur febla

[†] Lana kovrilo en aquespruva gudrotelo.

lumeto de steli. Ulaloke fore koyoto plendis pro hungro e respondesis da altra bestio asertante ke olua fortune esis mem plu mala. La melankolioza dueto tandem mortis, ma la melodio aceptesis da strigo en l'arbori proxim la domo. Sub la domo esis soni di mordetado e skrichado. Probable rati. Sonny kustumale ne permissis su esar perturbata da tala bruisci, ma il savis ke Harry vigilas, ed ilua destranquilesio semblis kontagia.

Kande la horlojo sonis dekedufeye, il audis ke Harry dicis, "Me deziras ke me ne tensabis ta kozo—esis exakte noktomezo, Sonny, kande me poniardagis Haggerty. Me komprenas ke me es dementa por tale parolar, ma—"

Tabor esis pronta konkordar ke il *ya* dementeskos se il ne kalmeskos. Lore Sonny audis misterioza sono en l'extera galerio. Ol esis anhelanta gruno longigita, sequata da lauta jemo.

La proskriptito tote ne kredis ye lo supernatura; ilua nervi anke esabis probata da mil danjeri sen faliar. Ma lore glaciatra priklo ecitis ilua spino ed il sentis ke la kordio forte batas.

Pos la jemo venis strangulita tusado e terorinda sono di plaudo, la klara sprico di liquido adsur la pavimento di la galerio.

“Es Haggerty!” anhelis Harry Stone. “Es lu, me dicas, Tabor! Es la fantomo di ta quan me mortigis!”

“Kalmeskez, Harry,” Tabor dicis, e sizis un de sua pafili e manuedo de alumeti. L’amiko staceskis e sequis dum ke Sonny tastis tra la koqueyo til la galerio. Ta ago postulis granda kurajo de Stone, nam ilua denti kliktis pro mizeroza teroro.

Sonny acendis alumeto dum pulsar su trans la pordo di la portiko. Ma sur la planki di la galerio esis makuli de faki e rivereti de obskura e briletanta redo.

Harry Stone emisis stranja krieto, e falabus sen ke Sonny ne suportabus il per un brakio. La vizajo di la posedanto di la Cirklo-X esis kolda e sudorifis pro hororo.

“Same kam *ta nokto!*” il babilis. “Itere la sango di Haggerty!”

“To es sango, yes ya, ma ne di Haggerty,” la proskriptito kalme dicis. “Tu havas enemiki, Harry, e me konjektas ke li volas terorigar tu de tua domeno. Ne lasez ke li ruptez tua kurajo per tala stulta dupajo, *amigo.*”

Stone indikis adinfre per tremanta fingro.
“Ma quale ... quale tu ton explikas?”

Sonny exploris per la lumo di la lampo prenita ek la koqueyo. Ol esis la sango di recente mortigita bovo o bovyuno, konkluze pruvata da la texuro di ula aspera reda hari quin il deskovris en ol. Pos explikir lo a Stone, la nervoza bov-farmisto balde rekuperis su.

“Es bona ke me ne esis sol hike. Me ankore forkurus.” Il grande sospiris pro alejo.

“Irge qua facis lo probable supozis ke tu ya esas sola. Li savis ke tu balde liberigesis del karcero, e li preparis por tu. Kande li vidis la lampo-lumo canokte, li opinionis ke es bona tempo komencar lia dupaji. Nun ni enliteskez e dormeskez!”

ANTE LA SEQUANTA MATINO, Harry Stone itere standis bone. Il anke esis furioza, e to esis bona signo. Il esis certa ke il savas qua facis l’eciteso hiere nokte. La nura homo qua sat deziras la Cirklo-X por facar lo esas Bill Lashly di la 7Y7, e Sonny konkordis ke la prui indikas ta konjekto. La senskrupula domenestro probable expektabis ke Harry esez kelke “karcero-dementa” pro la longa

kondamno, e la posedanto di la 7Y7 esperas terorigar Stone de la domeno por sempre.

Pos dejunar li tote exploris la Cirklo-X, e la suspekto di Harry konfirmesis. Lashly uzabis ta mikra ma bone aquizita domeno kom inkluzeyo por sua bovaro. Li vidis multa bovi e kavali di la 7Y7, e pro la sugesto di Harry, Sonny Tabor kaptis per kordo un de la kavali, reda kavalulo havanta blanka vizajo.

L'animalo weris la brulmarko di la 7Y7 en du loki, un de li havanta falsa marko por signifika chanjo di posedanto, anke markizita per la 7Y7-brulo. Harry dicis ke il ne trovabis ca kavalo dum kolektar e vendar sua animalo. Il nun iracoze riposedis sua propraĵo, e pozis antikva selo quan il retenabis adsur ol. Adminime il itere havas kavalo por kavalkar!

La sequanta du dii li spensis per laborar en la domo, reparis e netigis, e granda plubonigo facesis. Nula plusa viziti facesis da la "fantomo," nek da aliu. Li deskovris ke la noktomezala vizitanto venabis ed irabis per tre vivanta kavalo qua livabis "signo" indikante vers la Lashly-domeno!

"Longa tempo pasos ante ke tu havos salario, Sonny," dicis Harry Stone pos

kalkular. “Me havas min kam kinadek dolari en la banko.”

“Me ne anxias.” La proskriptito guturo-ridis. “Me volus helpar tu, ma me havas nur mea lasta dolaro e duimo.”

“Me mustas ganar bovi por ca domeno,” murmuris la posedanto di la Cirklo-X. “Me ne havos problemo obtenar banko-prestajo. Ca loko evidente valoras dekamil o dekeduamil dolari, e me hipotekizos ol por tam multa kam bezonata. Morge ni kavalkos a Monto-fonti e facos lo.”

Do ye jornesko di la sequanta matino la du amiki selizis sua kavali e kavalkis de la domo por ulmaniere ri-kapitaligar la longe abandonata Cirklo-X.

CHAPITRO IV.

Surprizi ye Monto-fonti.

TRI HORI ANTE DIMEZO li vidis l'urbeto, pos trapasar la maxim sovaja, maxim belega dezerto-peizaji vidita da Sonny. Monto-fonti, urbeto havanta popolo de forsan duamil homi, extensis su apud la bazo di saliajo di la ruptita, preske nuda montokateneno. Li eniris ol per nefrequentata furgono-voyo.

“Tu forsan ne plu fore irez, Sonny—me jus pensis pri tua risko,” Stone destranquile dicis. “La Fonti es la chef-urbo dil stat-distrikto, ed ushero es hike.”

“Me restos kun tu.” La proskriptito levis sua shultri. “Se l'autoritatozi hike rikonocos me, li rikonocos me ultempe, e plu bone nun. Ma me ne ekspektas ke me rikonoceskos. Ne anxiez pri me, Harry; tu havas sat multa anxio.”

Kelki atencis li dum ke li rapide kavalkis alonge la Chefa Strado e preterpasis la placo ube situesis la korto ek reda petro. Harry esabis absenta tante longe ke il esis preske nekonocata, e nulu remarkis la proskriptito. Ma decensante apud la Komercale Banko, Sonny sentis kudo-frapeto da sua kompanulo.

“Yen, ul homi de la 7Y7 grupacho venas alonge la strado kun la kamiono,” Stone nelaute dicis. “La grand homo qua kavalkas apud li es Bovulo Travis—lu nominesis laboristestro pos ke me mortigis Haggerty. Me rikonocas kelk altri, ma uli de li es nova.”

La grupo evidente esis ye la staciono por prenar lia kargajo di “sardini,” nam Sonny rikonocis la buxi amasigita sur la nova Studebaker-kamiono. Plura homi esis en la kamiono ed uli kavalkanta venis dop li. Li omna esis forte armizita, e Sonny sat bone judikis la homaro por konocar ke to esis grupo de robusta pafisti, hardigita e danjeroza. Li preterpasis la du ye la kavalo-posto, evidente sen vidar li.

“E yen Bill Lashly ipsa—venas ek la banko,” Stone murmuris.

Interesata, Sonny rapide ed akute evaluis la posedanto di la 7Y7. Il apene similesis la

sorto de homo expektata da Tabor—Lashly evis triadek-e-kin, cirkume, havis blua okuli e blonda hararo, ne nebela. Ilua blonda labio-barbo kurte tondita faliis celar la kruela senkompato di la dina boko, tamen, e la mentono saliiis quale la mandibulo di buldogo. Sorgeme vestizita, il weris chera boti e *chaparajos*[‡], e diamanto cintilifis en sua nigra kordet-kravato. Ilua du revolveri havis perla krosi, ma on facile vidis ke il ne weras oli por ornar su.

Rikonokante Stone, il proximeskis ed extensis sua manuo. “Nu, Harry. Quale tu standas? Me joyas vidar tu hike.” Bill Lashly smiled e montris sua denti.

Stone hezitis, lore tushis la manuo sen multa entuziasmo. “Saluto, Lashly,” il kurte dicis.

Il volis deturnar su, ma la homo de 7Y7 semblis dezirar konversar. “Ka tu volas itere bov-farmar? Me ne konsilus to, Harry. La tempo nun es mala.”

“Me havos bovi, yes,” Stone dicis. Lore vidante ke Lashly kurioze regardas Sonny Tabor, Stone introduktis il. “Yen Frank Jonson. Me engajis lu por helpar duktar la domeno.”

[‡] Getri.

Lashly totkordie ridis. “Me ne opinionas ke tu bezonos multa bovgardisti che Cirklo-X. Me dicis to quon me propozas, Harry. Me donos a tu duamil dolaro por tua domeno.”

“*Duamil?*” vakue respondis Stone. “Me ne acceptus *dekamil*.”

Lashly ridetachis, lore per manu-signo il livis por acensar karbono-nigra kavalo an la posto. Pos ke il forkavalkis a sua homi kun la kamiono, Stone repugnate sputis ed iris vers la banko. Sonny sequis, remarkante per la literi sur la fenestro di la Komercala Banko ke ol esas un de multa institucuri guvernata da la bank-magnato di Phoenix, Lorenzo Greene.

Ol esis turboza, prosperoze aspektanta banko, havanta plura kasisti dop bronza gicheto. La direktisto esis okupata an skribtablo en basa barilo alonge un parieto, e Stone eniris ta spaco per pordeto. Sonny restis apud la pordo, ma povis vidar ed audar la interviuvo di Stone kun la bank-direktisto.

La direktisto polite salutis Stone e gestis ke il sideskez koram il. La bankisto esis magra, obskura homo havanta komplezanta maniero, ed ulmaniere rimemorigis da Sonny spekulanto quan il ulfoye vidabis

plear “faro”. Il havis la sama dolca maniero —extere glata, ma simila a fera pugno en silka ganto.

Pos ke Stone propozis, la direktisto regretoze negis per kapsigno. “Me regretas, Stone, ma la pekunio-stando nun esas tre streta. Me ne darfas ofrar prestaji nun. Forsan dum la venonta yaro—”

“Ma me mustas quik startar, sioro Trotman,” Harry Stone protestis. “Quale tu savas, mea domeno es libera, e me volas havar nur kelka mili de dolari. Tu havos hipotekeo ye alta intereso—”

La komplezanta maniero di Trotman quik chanjis. “Tu audis to quon me dicis, e to es finala, Stone. Me ne povas prestar un centimo a tu.” Il foliumis dokumenti sur sua skribtablo e selektis papero. “Tu ankore havas kelka pekunio depozita hike--\$41.65. Ka tu volas havar ol?”

Stone staceskis, la vizajo nun plu blanka pro furio. Sen vorto il recevis la papero, donis ol ad un de la kasisti, e prenis la lasta restaĵo di sua bank-konto.

Dum ke Sonny vartis il hazarde regardis la strado. Proximeskante la banko e portante valizo esis granda ed obeza viro quan il quik rikonocis esar un de la viri vidita en la kontoro di guvernisto Frazer en

Phoenix. Ol esis Lorenzo Greene. Il pavonumis kun du robusta gardisti ye sua flanki.

Kande Greene e sua gardisti eniris la Komerкала Banko, Sonny tiris l'inklinata bordo di sua Stetson a sua okuli e flanis adextere.

Il ne esis certa, ma opinionis ke Greene astonate tresayis dum ke il preterpasis. Destranquile, Sonny esis kurioza, kad il esas rikonocata.

HARRY STONE, kun indignoza e deceptata mieno, venis a Sonny an la trotuaro e la du viri iris a sua kavali ed acensis. La proskriptito lastafoye regardis aden la banko dum ekirar, ma omno semblis kustumale, e Greene parolis a Trotzman. La pulso di Sonny normaleskis. Tre probable Greene faliis rikonocar il kom la proskriptito qua pafabis la santuario di Frazer nur kelka dii ante lore! Forsan, il pensis, mea chanco pluboneskas. Ma to esis apena eskapo!

“Il refuzis me, amiko, e me ne komprenas la kauzo,” murmuris Harry Stone, e fabrikis sigareto per tremanta fingri. “Me supozas pro ke me enkarcerigesis. Me es olima kondamnito ed omno stacas kontre me.”

“Forpulez ta ideo ek tua kapo, *amigo*,” la proskriptito konsilis. “La mondo ne stacas kontre tu—ma Bill Lashly facas lo. Me opinionas ke pro to tu ne ganis tua prestajo.”

Stone lasis faliar la alumeto sen acendar la sigareto. “Pro quo tu ton opinionas?”

“Ta papero havanta tua bank-bilanco,” Tabor dicis. “Lu havis ol ibe ye sua fingri. Ka tu supozas ke lu havas ol sur sua skribtablo dum la tota tempo tu enkarcerigesis? Ka Lashly ne jus ekirabis la banko?”

“Tondro! Me kredas ke tu es justa!” Stone aboyis.

Li diskutis lo en mikra restorerio ube li manjis ante irar a la Cirklo-X. Harry lore satisfacesis ke la 7Y7 facus omno por pulsar il de sua domeno, e Sonny inklinesis konkordar. Balde o tarde, konfronto kun Bill Lashly mustos eventar, ma la 7Y7 havas omna avantaji. O quale la stando semblis a Stone.

Cirkume du kloki posdimeze li rivenis a la domo di la Cirklo-X. La domeno plu bone aspektis, la herbachi e forjetaji forigita, ma sen bovaro ol esis tam sola e sensona kam tombo.

La du viri esabus kelke nervoza se li
cirkumirabus la domo ante kavalkar ad ol, e
vidabus la tri selizita kavali celita en la
saliko-kopso!

CHAPITRO V.

Pirotekni.

STONE STABLIGIS SUA KAVALO, ma Sonny Tabor ne desselizis Fardo e dicis a sua amiko ke il havas kauzo. Il ne mencionabis, til lore, la renkontro preske vizajo kontre vizajo kun Lorenzo Greene.

“Me mi-suspektas ke lu forsan rikonocis me—lu ya havis sat multa tempo studiar me tadie en la kontoro dil guvernisto,” Tabor dicis. “Omnakaze, me volas ke la kavalo esez pronta kaze ke me mustas kurar vers l’alta junki. Me opinionas ke Fardo anke suspektas. Ka tu vidas lua ago? Kalmeskez, puero.”

La makulizita kavaletto desquiete fulis, l’oreli spasmis e plateskis, quale se ol volis avertar sua mastro ke la situeso ne esas bona. Sonny sat bone konocis Fardo por komprenar ke bona kauzo existas por la nervozeso dil animalo.

Stone exploris la solitara voyeto e la lando tra qua li venabis; ol esis vakua, sen vivo, sen mem movanta ucelo.

“Me ne opinionas ke on sequis ni,” il decidis. “Komprenende, tu mustas evitar l’ushero Ed Fuller—lu es la sam homo en ta ofico kande me havis la trublo kin yari ante nun, e lu es ver chashundo se lu persequas on. Nu, ka ni irez al domo?”

Stone duktis il alonge la voyeto e lente acensis la gradi, shultri abasita pro decepto. Kande il apertis la pordo dil inkluzita portiko, Sonny esis jus dop il. Stone enirabis, e la proskriptito trapasis, ante ke li amba komprenis ke li pazas aden embusko.

“Ne movez, Stone! Vi amba, haltez! Ni havas vi!” grunis rauka voco.

Sonny lore komprenis la desquieteso di sua kavalo! En l’inkluzita portiko esis tri viri qui apuntis li per ektirita revolveri, ridetachante pro triumfo pri suceso. Pro la furio-krio da Harry, Sonny intelektis ke li esas employati di 7Y7, quankam ta tri ne esabis inter la homi vidita en l’urbeto.

Stone mi-movis vers sua armo, ma la redingoto werata da il preventis rapida movo por la pafilo en la zono ye ilua tayo, ed il levis sua manui. Samtempe il

nevoluntante retroe pazis, tushante Sonny ed impedante irga esforco posibla da Tabor.

“Quon vi homi volas hike?” Harry iracoze questionis. “Pro quo vi uzurpas—”

“Klozez tua damninda boko, Stone!” bramis un danjerozulo havanta dika kolo, ed il stekis la ventro di la posedanto di la Cirklo-X per la fusiltubo di sua Colt. “Tu ’s finit! Me volis facar co dum longa tempo, ma ne havis l’impero til hodie. La viro quan tu poniardagis esis mea kompanulo!”

“Tu savas pro quo me mustis mortigar lu, Stanton,” Harry ferme dicis. “E quon tu intencas dicar per ‘l’impero’? Ka ta Bill Lashly—”

“Cafoye ulo ekvarsesos hike ultre la sango di bovyuno,” mokridetis homo havanta streta mandibulo e maligna boko quale stala kaptilo plena de nereкта denti.

“Tro mala por tu, Stone, e la yunulo kun tu,” grunachis la triesma viro, qua havis nur un okulo. La perkutiti di omna tri asasinanti kliktis, e la aero ipsa elektrizesis da acido.

Semblis ke l’unesma penso di Harry esis por sua amiko. “Lasez ke mea employato irez, omnakaze,” il kurte dicis. “To ne es lua disputo.”

“Ka tu supozas ke ni liberigez atestanto?” mokridis la pafisto havanta un okulo. “Lu es

kun tu, to suficas. Es lua desfortuno e ne nia propra, segun la kansono. Oke, viri!”

Lore, dum ke la mortiganti signalis lia intenci per la tensanta fingri an la destensili, Sonny Tabor agis!

La manui hastante adinfre por la pafili, il frapis Harry per sua shultro, forpulsis il de su e de la pafo-direciono. Samtempe il squatis, flexis ye la tayo e genui.

“Ho, tu dementa—” bramis la dika Stanton dum ke ilua granda revolvero ruktis plombo e flamo.

Ma dum pafar, Sonny glitabis adlatere, e la kuglo siflis sinistre super il. Ante ke Stanton povis itere polexagar la perkutilo, Tabor sendabis arachanta kuglo tra ilua grosa e kurta korpo. Kun serio de grunacheti, Stanton laxeskis quale perforata porko.

Harry Stone montris ke il anke bone savas la paf-arto. Ankore shancelante pro la violenta pulso da Tabor, il forte ektiris sua Colt e pafis ye l'intruzanto havanta streta vizajo de ne plu kam sis futi. La pafo sucesis, nam Sonny vidis ke la homo baroke jiras e falis kun spruco de karmezino ek la temporo. Il rulis vers Tabor, preske faligis il, lore rekteskis e ne movis.

Tabor kambiis pafi kun la pafisto havanta un okulo. La homo de 7Y7 dufoye pafis, l'una quik pos l'altra; l'unesma kuglo resonante frapis latuna lav-kuvo pendanta sur la muro, la duesma perforis un de la ali di la *chaparajos* di Tabor. Lore l'altra okulo di la dezerto-homacho anke blindeskis kande kuglo trairis ilua kranio. Il falis adavane tra la fumo.

LA GRIZA VIZAJO DI HARRY STONE spasmis ante ke il povis sat rekuperar sua voco por parolar. Il palpebragis ye la tri senmova formi sur la pavimento di la galerio, frotis sua okuli, lore regardis Sonny e sucesis ofrar lenta rideto.

"Komprenez, yunulo, til nun me opinionis ke kom pafisto tu es poke tro-evaluat," il dicis. "Ma nun me diferante savas! Ta homachi esis tam bon destensilaganti kam irgu dil domeno di Lashly. Tu ya salvis mea pelo."

"Me opinionis ke me salvis mea propra," la proskriptito kaprice dicis. Il frapetis la vakua kartochi ek la cilindri di sua Colt-i ed enpulsis nova kartochi per polexo. "Ta Lashly-koyoto advere ne pleas kun tu, Harry. Pos stopar tua kredito, il evidente

decidis ke la nura certa moyeno es enlitigar tu por sempre.”

Harry esis ye la pordo di la galerio, askoltis e strabe regardis ulo fora. “Yen venas altra grupo de kavalkeri de la direciono dil urbeto!” il anhelante dicis.

“Plusa amuzisti del 7Y7?”

“No. Vartez un instante! Me opinionas ke to es l’autoritatozi!” klamis la posedanto di la Cirklo-X. “Yes, me rikonocas l’ushero Ed Fuller. Forsan tu esis justa pensante ke tu rikonoces!”

“Me esis *tote* justa,” Tabor kurte dicis dum kurar aden la koqueyo ye l’opozanta latero di la domo. Ante ke Harry Stone povus dicar un vorto, Sonny akute sufliis por Fardo. La makulizita kavalo hastis vers il, e l’eskapinto “flugante” acensis. Agitante la tero, kavalo e kavalkanto desapariss aden la pini qui bordizis la gazono.

Min kam un minuto plu tarde, sep kavalkeri haltis apud la gradi di la galerio, duktita da severa viro havanta salianta mandibulo e weranta stale bordizita binoklo e la stelo-formacata insigno di ushero. Il hastante saltis a la tero e duktis sua bando alonge la gradi til la portiko. Kurtigita fusilo esis en ilua manui, e l’altri di la bando

herisesis per Colt-i e Winchester-i. L'okuli di la nervoza viri esis larje apertita.

"UBE ES TUA EMPLOYATO, STONE?" l'ushero ecitoze demandis, vidante Harry ye la pordo.

"Pro quo tu volas lu, ushero Fuller?" Stone ajornante questionis. Lore, opinionante ke il pluse parolez: "Esis trublo hike—pafado."

"Ni *supozis* ke ne audis pafi plu frue," Fuller kurte dicis. "La kauzo ke ne volas vidar tua bovgardisto es ke lu es— Ho! Pro amo de—" Il apertabis la pordo di la galerio e vidis la tri kadavri. "Santa fumo! Hastez, viri! Uli cirkondez la domo dum ke me traserchas la chambri. To similesas la laboro di Tabor!"

"Ka Tabor?" Stone questionis, ilua pala vizajo kom maskilo.

"Yes ya! Ta homo quan tu engajis es nulu altra ecepte Tabor, la proskriptit ocidanto!"

Dum kin minute la bando kuris tra la domo e cirkum ol, serchante l'extera konstrukturi e mem la kelero. Pose ushero Fuller serioze questionis Stone.

"Adube lu iris? Quadirecione, Stone?"

"Me ne povis vidar," Harry verdicante respondis, "ma lu saltis tra la fenestro

vidinte vi. Irge qua lu es, ushero, lu jus salvis me. Ta viri extere en la portiko esforcis mortigar me. Li es homi de 7Y7.”

Fuller severe regardegis la domenestro di la Cirklo-X. L’ushero esis tre ecitata, ma la homi semblis plu alejata kam altre pro ne trovi Tabor ibe!

“Me ne interesas nun pri irg enemikeso inter tu e tua vicini!” l’ushero aboyis. “Ma me ya savas ke tu ofris helpo e konsolaco ad eskapinto de judicio, od intence o ne! To esus harda por tu, Stone, pro tua pasinto. Nu, tu ne esis ek la karcero plu kam un semano!”

La anxioze rugoza vizajo di Harry redeskis pro iracema shamo. “To es ver,” il rauke dicis, “ma tu ne savas la *tot* vereso, ed ulfoye to es plu mala kam savar *nulo*. Se me arestes pro defensar me—”

“Me regretas ke me mustas pro la cirkonstanci,” Fuller hezitis. “Do se tu transdonos tua pafilo—”

“Atencez!” balbutis pavorigita membro di la bando kande ombro aparis ye la pordo. “Ol es—”

“Levez via manui,” lente dicis la pueratra yunulo havanta blua okuli, qua apuntis du .45-revolveri, tenita ye la nivelo di sua hanchi. Il ridetis, ma la kuglo-cikatrata

“foseto” en la vango igis ke ol esez kelke tordita e sardonika. Manui alte levesis, e plura pafili pezoze klakis adsur la pavimento. Li omna esis tro shokata e terorigita por parolar.

“Me opinionis ke me devas rivenar e justigar la situeso hike, sioro ushero,” decideme dicis Sonny Tabor, quale se lu konsideras singla vorto. “Stone engajis me kom ‘Frank Jonson,’ do tu ne darfas akuzar lu pro celar proskriptito. E ta homi ibe—me mortigis *omna tri de li*. Komprenez? Nun, siori—*adios!*”

La pafili ankore apuntita, il rapide retroe pazis ek la domo, lore de la supraĵo dil eskalero di la galerio il saltis adsur la vartanta Fardo. Il foriris quale kometo, la makulizita kavalo kurante del una latero al altra quale hastanta kuniklo! L’ushero tandem ekiris, e per la revolvero pafis plura impetuoza pafi qui faliis de multa metri, e lore l’eskapinto itere desaparís aden la foresto.

“Venez, viri! Sequez lu! Ni ganos lu mortinta o vivanta!” klamis ushero Fuller dum klimar adsur sua kavalo. Ilua bando, ne tam avida kam sua chefo, plu lente acensis. Li fulante galopis segun la

direciono sequata da Tabor kun multa bruio e polvo.

Harry Stone livis la domo ed anxioze marchis a rokoza monto distanta de un quarimo di milio. Pos klimar ol, il havis bona vidajo di la cirkondanta lando, e povis vidar ke la persequo-bando separas su ed extensas su. Tabor e sua nigra e blanka kavalo ne esis videbla da Stone. E pro la kavalko-maniero di la homi dil ushero, Tabor e sua kavalo anke ne esis videbla da li!

Stone longatempe spektis, pose ridetante decensis de la monto e rivenis a sua domo. Apertante la pordo di la galerio, tamen, ilua rideto desaparís.

“Per la diablo!” il klamis.

Tri mortinta viri devis esir sternata sur la portiko, ma nun esis nur du. Un de la kadavri—la kadavro di la homo havanta streta mandibulo quan Stone ipsa semblante pafabis tra la kordio—esis absenta!

CHAPITRO VI.

Ye la 7Y7.

ANTE KE DU MILII DESAPARABIS sub la rapida hufi di Fardo, la proskriptito evitabis la bando di Fuller, literale kuris per cirkli cirkum li e livabis li “blasfemanta e bolianta”. Mem sen la direktanta manuo di la mastro, la makulizita kavalo superruzigus e devancus la servisti dil autoritato, nam la tenue muskuloza, rapide kuranta animalo havabis multa exerco pri ca ludo ecitanta e danjeroza. Ulfoye Sonny opinionis ke Fardo ya juas ol, mem kande la kugli proxime siflas!

Sonny duktis la persequanta bando adnorde aden aspera e ruptita dezerto plena de roki e cedri. Lore, kande il certigis ke la homi de Monto-fonti vagas en mistifikanta labirinto, il iris adsude per larja arko, cafoye lente e sorgeme kavalkante por celar sua traci.

“Bona facado, Fardo.” Il gutur-ridis.
“Omnakaze, tu bezonas exercio; tu ocieskis.”

Rivenir a la horniso-nesto che Cirklo-X esabis riskoza til temereso. Ma il joyis ke il ton facabis. Il konfesis mortigir omna tri viri por absolvar sua amiko. Pro la mala pasinto di Harry, il male sufrus se il esus intrikata en irga mortigo-kazo. Por Tabor to ne multe importis, nam sua pasinto esis ja nigra. Stone mortigabis ta pafisto havanta streta mandibulo—dum yusta lukto, komprenende; ma Sonny joyis ke il ipsa asumis la kulpo.

“Se me kredis ye fantomi,” il pensis dum ke Fardo portis il adsude, “Me dicus ke la domo dil Cirklo-X *nun* es fantom-frequentata, yes ya.”

Il voyajis adsude pro bona kauzo; Harry dicabis ad il ke la 7Y7 esis tadirecione, ed explikabis la voyo por atingar ol. Sonny volis vidar ta domeno!

Brulanta e maligne reda suno glitis ad dop la horizonto en violentoza mixuro de kolori, e krepuskulo venis kun la planeto Venero kom la vesperala stelo. Sonny savis ke il esas dume sekura del ushero. Ante jorno il esus for, ek la resortiso di Fuller. Rapida iro facus lo, e Fardo ya povus facar lo. Ma unesme il volis helpar rezolvar la

trubli di la Cirklo-X. Funde, il havis nulo perdinda ecepte sua vivo, e to ja perdesis!

Ante obskureso arivis il venis a bone uzata furgono-voyo, e sequis ol til ke il vidis la chefa domo di la 7Y7. Lore il livis la voyo por proximeskar al edifici de altra latero.

La domeno semblis esar prosperoza, ed esis plu granda kam sis domeni tam mikra kam la povra Cirklo-X. Olua multa edifici dispersesis tra kopso de imensa kotonopopli: esis plura granda inkluzeyi, plu mikra bovo-klozaji, ed alta ligna vento-muelilo e lageto.

NE TIL TOTA OBSKURESIO Tabor plu proximeskis. Lore il livis Fardo en arborizita ravineto, ube la kavalo audez rapide siflata signalo, e cirkonspekte pede avancis. Lampo-lumo ja markizis la domeno-domo per flava quadrati, ed il suspektis ke ulo nekustumale interesanta eventas interne. Garita proxim la utensil-hangaro esis kavalo e faetono qui ne semblis apartenar a la domeno. Lashly, semblante, havas vizitanto.

Tabor, qua esis *l'altra* vizitanto ne konocata da la 7Y7, reptis a la muro di la longa domo blanke fardizita ed ad un de la

partale apertita fenestri. De ca oportuna loko il povis vidar ed audar to quo eventas en l'ultra chambrego.

Komence il kelke dazlesis da la brilante lumizita chambro ipsa, e remarkis nur la luxozeso di la mobli, la rango de prezervata cervo-kapi, pelo-tapiseti, ed altra trofei, l'imensa herdo. Sur tablo meze di la chambro esis ozier-kovrita damijano de wiskio e pleto de glasi.

Bill Lashly sidis proxim la fenestro, tante proxime ke Sonny povabus extensar brakio tra ol e tushar ilua shultro. La fumo de ilua sigaro sempre vagis aden la vizajo di la proskriptito, e Sonny mustis gardar su kontre tusar.

“Tro mala se tu mankas pekunio, ma me ne komprenas quale me helpez,” Lashly dicis.

La proskriptito surprizesis rikonocar l'altra viro en la chambro kom Trotman, la komplezachanta direktisto di la Komercala Banko di Monto-fonti. Il marchis adavane ed addope alonge la pavimento per larja e destranquila pazi.

“Lorenzo Greene, damnez lu, verifikos mea kontlibro ante un o du dii, e me mankas dekesisamil dolari,” Trotman dicis per angoroza voco. “Me ne expektis lu ante

plura monati, ed ante ilua veno me povabus jonglar ulmaniere. Cakaze, sen ke tu helpas me, me iros al karcero.”

“Me certe ne havas dekesisamil kontanto,” la posedanto di la 7Y7 kolde dicis. “Me forsan donus a tu paperi—pago-promisi quan tu povus montrar a Green e plu tarde destruktar.”

“Me ja havas amaso de tua pago-promisi, Bill,” Trotman dicis. “E la sumo de li esas plu kam la valoro di ca tua domeno. Greene ne naskis hiero, nek prehiero! Mem se mea kontlibri bilancus, me desfacile explikus pro quo la Komercala Banko permissis a tu tante multa prestaji. Ni esas ensemble en ca truo, Bill, pro ke kande Greene vidos omna ta promisi, lu quik deklaras oli pagenda.”

Lashly staceskis e varsis forta drinkajo por su. “Pro quo Greene ne ja examenis tua libri?”

“La grosa olda fola supozis ke il vidis la proskriptito Tabor en l’urbeto,” la bank-direktisto dicis. “Il igis ke ushero Fuller sumnez bando por persequar lu. Semblas ke ta employato di Harry Stone multe similesas ca Tabor-homo.”

Lashly rideskis. “Pah!” Il desestimante snortis. “Ka *ta* yunulo havanta la infanto-vizajo esez la proskriptitulo qua pafante

ecelas la tota Arizona? Hodie me vidis ta yunulo kun Stone. Greene es dementa.”

“Nu, me joyis pro l’eciteso, omnakaze,” Trotman dicis, e vishis sua vizajo per silka naztuko. “Do pose me persuadis Lorenzo ke lu kontrolez ta banketo che Rio Tinto ante examenar la mea. Morge il adibe kavalkos kun sua gardisti. Askoltez, Bill, co ya importas—”

“Tu vartez,” grondis Lashly, e Sonny plu retroe movis de la fenestro dum ke la domenestro staceskis. Ma Lashly iris a pordo komunikanta kun altra parto di la domo, apertis ol, ed advokis sua laboristestro.

KANDE BOVULO TRAVIS ENPULSIS SU, la larja shultri plenigante la pordo, Lashly akute questionis: “Ka Stanton e l’altra ne ja rivenas?”

La grandega bravacho di la 7Y7 agitis sua simiatra kapo del una latero al altra. “No, li ne venas,” il grondis. “Ka tu supozas ke li fushis la tasko? Me ipsa devis irir.” Il gestis per kapsigno ye la bankisto di Monto-fonti, pose varsis por su plena glaso de la sucinea alkoholajo, glutis ol per un rapida gluto—quale rospo glutas musho.

Lashly repugnate blasfemis. “Me sendis tri de mea viri adche Stone,” il explikis a Trottman. “Li devis rivenir longe ante nun.”

“Me refuzis prestajo a lu camatine, quale tu demandis,” Trottman said. “Tu ne intencas dicar”—il parolis min laute—“ke tu imperis ke il *mortigesez*, ka ne?”

“Lu es nun tam mortinta,” Lashly sufideme dicis, “kam sua nomo—la stono. Devis eventir kin yari ante nun.”

La bank-direktisto itere pazis sur la tapiseto. “Me sempre savis ke tu havas sablo, Bill. E se tu havas sat multa sablo por tala ago, tu havas sat multa por egale partoprenar projeto da me. Me dicis a tu, ka ne, ke Greene morge iros a Rio Tinto?”

“Kun la du gardisti, yes. Nu?”

“Esas kauzo por la gardisti—Greene portas quaradekamil dolari en valizo,” Trottman said.

Lashly e sua granda laboristestro regardetis l’una l’altra. Bovulo Travis admirante nelaute siflis. Lore la posedanto di la 7Y7 turnis su a Trottman, la naztrui dilatata quale ti di chashundo. Il pozis rapida questioni, ka la bank-direktisto esas certa. Trottman esis certa.

“Lu havos la pekunio kun lu, yes ya, e se tu e tua homi advere havas kurajo,” la viro

del urbeto dicis, “quaradekamil esos nur la komenco. Grosa Lorenzo Greene valoras adminime du milionoj. Ni devas havi peco de ti sumo.”

“Me prizas ti propono, Trotman.” Lashly volfatre ridetachis. “Multe de miaj projektoj recente falis, e mi bezonas *dinero*,[§] multa *dinero*. Ka Greene iros per la Kuprakloŝo-voyo?”

“Il iros tavi—il volas esti en Tinto antaŭ mi,” la bank-direktisto aŭdis dicis. “Ka ti forcos?”

“Kad forcos? Ni *facos* lo!” Lashly guturidis. “Nun ti iru a ti banko e restu quiete tiel ke ti aŭdas de ni. Ti troblu pri la verifiko devas esti finigita.”

La bankisto Trotman deklaris. Il akceptis lasta drinkaĵo, e sigaro, e poste aldis sia ĥosto. Sonny Tabor spektis ke il vivas la ĥambro, poste aŭdis ke il forveturas per la kavalo e faŭtono.

Lashly e Bovulo Travis restis en la ĥambro, konversis e projektis. Ekstere, Sonny Tabor anke projektis. Tio quon il savus esis interesanta. Tia homoj quala Harry Stone enkarcerigas, il ironioze pensis, dum ke tia buzardi quala Lashly e

§ Pekunio.

Trottman respektesas, admiresas. La mondo semblis plena de neyusta pafisti.

Subite hororinda bato frapis la dopa parto di la kapo di Tabor!

La brakii e gambi subite senpova, la proskriptito frapis la tero dum ke fairatra steli, kometi e vindileti dansis avan l'okuli. En la febla lumo il vidis, o supozate vidis, ke la viro havanta streta mandibulo stacas super il, la pafisto qua devis esir mortinte sternata che Cirklo-X.

Dum rapida instantly la proskriptito opinionis ke la minacanta figuro esas fantaziala viziono, ulo imaginata da sua domajata cerebro. Ma la viro esis sat reala! Il pedfrapeskis sua viktimo ye la kapo per sua pezoza boti. Tabor desesperante esforcis rular, prenar sua pafili ek la pistoluyi, ma la telegrafo-fili inter manui e mento faliis. Plusa frapi venis, ed il senkoncieskis.



“Oke, Fardo! Ni irez!” Tabor kantis dum kurar ek la domo di Lashly. “E ni mustas rapide irar!”

CHAPITRO VII.

Barako-batalio.

“ME ESIS NUR SKRACHATA, e me dicas a tu, patrono, ke l’ushero e sua homi esis ibe kande me koncieskis. Ca yunulo ya es Tabor! Lu es la proskriptitulo, yes ya, e lu manuagas revolveri quale la diablo ipsa!”

La kaptanto di Sonny, la pafisto havanta deformata mandibulo, parolis kande la forte batata proskriptito rikoncieskis en la domo di la 7Y7. En la granda chambro esis la posedanto e la laboristestro, e la tota grupacho di Lashly, entote sep viri. Sonny sternesis sur la pavimento, e li asemblis su cirkum il quale volfaro pronta mortigar.

Tabor ne serioze domajesis, ecepte kontuzita e bufata vizajo e feroca kapdoloro. Il ne savis quante longe il esis senkoncia, ma pro la sango solidigita cirkum un okulo, komprenis ke longa tempo pasabis.

“Ka tu advere es Tabor, la pafisto?” rauke dicis Lashly vidante ke la proskriptito rikonceskas. Kande Sonny ne quik respondis, la domenestro adavane pazis kun blasfemo e donis a la senpova e senarma yunulo pedfrapo qua sukusis la kosti.

“To es vera,” Tabor konfesis pos rekuperir sua respiro.

“Stone sendis tu adhike por ocidar me, ka ne? Nu, me traktos Stone quik pos altra tasko kompletigesez,” Bill Lashly grunachis. “Ka tu dicis ke l’ushero esas che Cirklo-X, Snag?” il questionis la homacho havanta la leda mentono.

“Yes, es chaso por Tabor,” Snag grondis, e tushis la flanko di sua kapo ube la kuglo frolabis ol.

“*Bueno!* Tre bone!” Lashly ridachis. “Dum ke l’autoritatozi okupesas su per persequar ca puero, ni facos *nia* tasko! Omno bone iras! E por ca Tabor—” Il intencante ektiris un de sua revolveri havanta perla krosi ek olua komplikate skultita ledra pistoluyo.

“Tu savas, ka ne, ke esas premio de sisamil-e-kinacent dolari por ca *muchacho?*” dicis Snag.

L’okuli di Lashly avareskis. “Tante multe? Anke mortinta-o-vivanta, me audis. Nu, me ganos per lu—mortinta. Ma plu

bone pos ke la tasko pri Lorenzo Greene koldeskabos. Ni nur retenos Tabor pokatempe. Lu es valoroza.”

LA SEQUANTA PLURA HORI ne esis agreabla por la kaptata eskapinto. Il expektis—e recevis—plusa mala traktado. Pro ke il refuzis diskutar pri Stone, il esis itere batata, e Snag facis la plu multa pugno-frapado. Sonny ne esis naturale venjema, me il esis sat homala por joyar ke la pafo da Harry Stone ne mortigabis ca brutulo havanta nereкта denti—Sonny avide anticipas *ipse* facar lo.

Ma ilua oportunaji por facar irgo semblis kelka. La grupacho manjegis dejuno longe ante jornesko, e preparis frue livar por sua embusko-tasko an la Kupra-klosho-voyo. Tabor esos livata che 7Y7 kun Snag kom gardanto. Perdinte du viri, Lashly ne povis sparar altru.

Pro ke Tabor esis, segun li, ja mortinta homo, li libere diskutis lia projeto koram il. La richa homo di Phoenix, Lorenzo Greene, esos surprizata e kaptata ye loko nomizita Lacerto-roko. Ilua du eskorti esos quik mortigita, e Greene—kun ilua valizo plena de pekunio—esos portita a la 7Y7. Pose Lashly decidis kad il riskez extorsar mem

plusa pekunio de il per tormento. Omnakaze, la maligna afero mustas finar per la morto di Lorenze Greene, nam, quale Lashly dicis: “Mortintuli ne multe parolas.”

“Bovulo Travis direktos, pro ke me ne esos kun vi,” Tabor audis ke Lashly dicis a sua homi. “Me nun kavalkos a Monto-fonti, por ke la tot urbeto videz me. To esos la maxim bon alibio, kaze ke on suspektas me e me bezonas alibio.”

“Bonege, patrono. Tu esante vidita en l’urbeto helpas.” Bovulo Travis ridetachis. “Ni facos la tasko. Ma ka tu advere donos la duimo dil profito a Trotman?”

“Ton lu supozas, omnakaze.” Lashly ridis dum acensar sua nigra kavalo.

Pos ke la posedanto di la 7Y7 irabis, la altra kin homi preparis su por la mortigo-tasko. Regardante li, Sonny decidis ke la futuro esos maligna por Lorenzo Greene. Ta banditi esis tam klementa kam krotalaro. E nesimile a krotali, li ne kliktigas la kaudo ante frapar!

Maxim danjeroza dop Bovulo Travis, probable, esis Nigra Sarko, pafisto havanta perforant okuli qua sendubite plenigabis multa tala buxi! Quale l’altri, il esis homo de du pafili, astonante blasfemema e vicioza.

L'altra mizerozuli de ta friponaro esis Tranchita Nazo Kay, mestico de Mexikia nomizita Pancho Fernandez, e viro quan li nomis Pumpo-mancho Pressler. Ca homo esis angulatra e magra; ilua spasmatra maniero movar probable esis la kauzo di ca surnomo. Sonny ne dubitis ke kom mortiganti li esas tote kompetenta.

Il ne lore surprizesis pro ta kargo de municio markizita kom "sardini," nam ca grupacho semblis uzar multo. Il spektis dum ke li charjis fusili e plenigis kartochozoni, e Pancho mem pozis un zono cirkum la shultro quale bandoliero, dum ke li preparis su. Kande li livis, mokante adiante Sonny, la suno jus acensis.

"Do, bone, Tabor," aboyis Snag, "aden la barako! Es tu e me dum la restajo dil dio."

Sonny pulsesis aden la liteto-hangaro di la homi, edificio havanta plata tekto e muri ek pin-ligno e gudrizita papero. Ol esis granda e komfortoza hangaro, moblizita per plu kam dekedu liteti en du rangi. Snag pedfrapis sua kaptito al fora extremajo dil edificio e postenizis su apud la pordo.

"Me anticipe dicis a tu," Snag dicis montrante sua nerehta denti, "ke me ne pluse dezirus kam ekvarsar tua cerebro adsur la pavimento. Nur rimemorez lo, se tu

sentas su fortuneza! Me es tre bona pafisto.”

“Tu ne esis tante bona hiero,” Sonny ne rezistis rimemorigar da Snag dum ke il sideskis sur liteto.

Snag sulfoze maledikis il, lore ektiris paketo de lud-karti e pleeskis ludo di pacienteso. Il dume spektis sua kaptito, e Sonny komprenis ke il duos facar lo. Snag esis inteligenta; il ne esis facile dupigita.

Ma Tabor anke komprenis ke ca pafisto *mustas* esar vinkita od evita. Ecepte la granda Colt-revolvero di Snag, la chanco esis egala, e ne esos tante favoreze plu tarde. L’evento *mustas* balde facesar. La kidnaponta ocideri ja avaniris.

“Sep” ankore restis sur la lud-kubo di Sonny, se il povus rular ol! La grupacho di la 7Y7 ne deskovrabis Fardo, ed il savis ke sua fidema e pacienta kavalo ankore vartas il en la proxima ravineto.

Ecepte benketo proxim la furnelo, nula mobli esis en la chambro ecepte l’odorachanta liteti. Pro ke la vetero esabis nekustumale varmega dum la pasinta semano, la plu multa fenestri esis kelke apertita. Olti esis tro mikra, tamen, por mem desesperanta homo trasaltar.

Sonny staceskis e pazis vers sua kaptanto. “Ka tu havas la kozi por facar sigareto?” il milde questionis.

Il ne fumagis, ma il pensis ke il forsan sat proximeskas a Snag por saltar. La bandito di la 7Y7, tamen, ne permissis lo.

“Retroe pazez! Me pafos tu se tu venos plu proxime a me, Tabor! Tu ne longe vivos, e tu plu bone abandonez tabako,” Snag sardonike sputis.

La kontuzita vizajo di Sonny dolorigis il kande il ridetis. “Homo nultempe presavas quante longe lu vivos, Snag,” il dicis. “Tu ne tro sane aspektas, tu. Hiere tu apene eskapis kande ta kuglo skrachis tua kranio. Me olim konocis viro, en Nogales, qua dementeskis pos recevar tala skracho. Me opinionas ke tu nun esas kelke dementa.”

La maligna vizajo di Snag dum instanto montris anxioza e tresayanta mieno. Lore il murmuris blasfemo e duris plear sua ludo de pacienteso.

“Exemple, se tu ne esus kelke dementa, tu probable gardus tu kontre Harry Stone,” Tabor dulce sugestis. “Tu ne opinionas ke me sole venis adhike, ka ne?”

“Quon tu volas dicar?”

Sonny esis proxim la fenestro, ed ilua siflo sonis, resonis laute e klare. Snag

saltante staceskis, la lud-karti flugis cirkum il. La batado di hufi sonis, rapide proximeskante.

Snag gratante ektiris sua pafilo e shancelis vers la maxim proxima fenestro. “Se to es Stone, me mortigos—”

Ante ke la bandito di la 7Y7 komprenis ke la makulizita kavalo qua batante kuras ad li havas vakua selo ed ocilanta estribi, Sonny Tabor esis an il quale tigro! Ilua sinistra manuo klozis adsur la dextra karmo di Snag, e saminstante il retroe frapis la kapo di la bandito per martelatra krako an la latero di ilua tordita mandibulo.

“Ho tu—” L’alta e povoze formacata pafisto grunachis, e de ta tempo il furioze bataliis por sua vivo. Ilua Colt-revolvero matide falabis a la pavimento di la barako, e la du viri furioze luktis por ganar ol. Sonny lore rekompensis Snag por la puniso il ipsa ricevabis dum esar senpova; cirkumirante la plu altstatura viro, ilua harda pugni flugis quale la flagranta pulsi di rapiero. Ed ilua pugno-frapi pulsesis da terorinda vaporepovo!

Plurafoye la longa gambi di Snag foldis sub il dum ke krako pos krako frapis, ma Sonny ne povis ofrar la frapego por senkonciigar il. Lore, pos faliar frapar la

saltetadanta antagonisto adminime dekedufoye, Snag ipsa sucesis per bona frapo e Sonny falis retroe adsur la muro.

Kun karmenizita ridetacho triumfala, Snag squatis por riganar sua revolvero. Saminstante, Sonny sizis la pezoza benketo kom armo.

“Ol es fixigit, folulo!” Snag kriachis, ma ilua ridetacho ekvishesis kande Sonny arachante levis la benketo, inkluzante la skrubi, e jetis ol ye la kapo di la bandito. Ol nur frolante frapis la kapo di la Snag, ma il shancelis pro la frapo ed ilua pafo faliis. Ante ke il povis itere pafar, Tabor esis sur il. Adinter la rangi de liteti li luktis, li amba tenante la revolvero quale dronanta homi.

Ol esis pafilo havanta duopla ago, ed evidente havis lejera destensilo, nam dum la lukto ol eksplozis per surdiganta bruisego. Sonny sentis fairatra doloro an sua fauco, e dum instanto supozis ke la kuglo frapabis il. Ma il nur esis brulita da la polvo.

La kuglo irabis adsupre tra la pektoro di Snag, e la lukto finesis. La viro di la 7Y7 rulis adsur sua flanko per konvulsatra trepido. Lore ilua vizajo rigideskis en finala e ruptita morto-ridetacho.

HASTANTE EXPLORANTE LA BARAKO, Tabor trovis sua propra zoni e pafili sur la mantelo di la herdo. Il metis oli, lore rapide exploris la koqueyo, e trovis pano e karno. Dum manjar olti—nam il hungregis—il donis a su plusa .45-kartochi. Olti venis ek la familiara buxo markizita “Sardini”. Mikra plomba e latuna fishi qui mordas!

“Oke, Fardo! Ni irez!” Tabor kantis dum kurar ek la domo di Lashly. “E ni rapide irez!”

Fardo joyoze brametis sentante la pezo di sua mastro itere sur la selo. L’animalo forsan ne savis ke ol pleabis decidanta rolo en la lukto di Sonny kontre Snag, ma Fardo ya savis ke la tempo irar venabis! Per rapide batanta hufi frapante sablo e gravio, la makulizita kavaletto kuregis adnorde vers la Cirklo-X.



*Tabor kavalkis vers la haltigita kamiono di la milioniero
kun la manui levita kelke plu alte kam la shultri.*

CHAPITRO VIII.

Morto ye Lacerto-roko.

SONNY AKUTE REGARDIS LA DOMO DI STONE ante engalopar, ma esis nula signo di nedeziirebla vizitanti ibe, e la voyo semblis esar sekura. Il ne volis itere renkontrar la persequanta bando di ushero Fuller, se posible—on ne darfas tro multe fidar a fortuno. Vere, sat multa laboro restis por l'ushero, ma to esis tasko quan Tabor volis ipse traktar!

Harry Stone exkavis trui por fenco-posti por extensar sua inkluzeyo—plu por esar okupata kam pro altra kauzo, nam il ankore havis nula bovi por l'inkluzeyi, nek irga posiblajo obtenar oli. Vidante Tabor, il forjetis sua utensili.

“Sonny! Me opinionis ke tu esus ye la Grand Ravinego ante nun! Ka tu ne komprenas quante riskoza, en tot sunlumo, venar—”

“Acensez tua kavalo, *compadre!*”** esis lore la nura dicaĵo di la proskriptito.

Harry ridetis e selizeskis sua kavalo sen questionar, nam il komprenis per la maniero di Sonny ke afero extraordinara eventas. Dum ke la posedanto di la Cirklo-X levis sua selo adsur la kavalo, Sonny regardis vers la domo e vidis ke la kadavri di la du mortigita friponi jacas sur la gazono sub kanvasa gudro-telo.

“Tu ne vizitesas da irga fantomi hiere nokte, ka ne, Harry?” Tabor questionis dum helpar sua amiko ligar la selo-zoni.

“No, ma expektis esar—me tote ne dormis!” Stone barbuliis. “Quon tu pensas? Un de ta kadavri staceskis e formarchis! Lu ne esis mortinta, me supozas.”

“Lu es nun tre mortinta,” Sonny lakonike dicis. “Me ĵus venis de la 7Y7.” E dum ke Harry preparis su, Tabor kurte naracis to omna quon il saveskabis che Lashly, e skisis la projekto por kaptar Greene. Harry askoltis, l’okuli larjeskanta.

“Yes ya, me savas ube esas Lacerto-roko—ne distante de hike til la Kupra-klosho-voyo,” Stone anhelis. “Ma ka tu riskos tua vivo por salvar ta rich malulo di Phoenix?”

** Kompanulo.

“Il es richa ed il esas malulo,” la proskriptito konfesis, “ma me helpus *irgu* kontre ta Lashly bandacho. Ka tu?”

“Ni kavalkez,” Harry severe dicis. “Tu ya es justa. Ni decidis la disputo kun ta bandacho, ed o bone o male, por sempre!”

Harry savis voyo por kurtigar la voyajo a la ravinet-embusko per tri o quar milii, ma il avertis ke la voyo esas aspera; il sate estimis Fardo por fidar ke la makulizita kavalo duos, ma ne esis certa pri sua propra kavalo. Tamen, li decidis riskar lo, nam minuti esas precoza. Acensante la monto-kateno ube Harry hiee spektabis l’ushero-bando, li iris direte aden la sovaja monto-dezerto. Lia trubli lore komencis, nam esis nula voyeti ed omno esis baroka intriko de cedri, arbusti, gravio, e kaktusi.

Fardo esis tam ajila e ped-habila kam monto-kapro, ma pos kelka milii la kavalo di Harry sempre plu lenteskis.

“Tu devas avane kavalkar, Sonny, se tu volas rajuntar ta Greene-homo ante ke il atingos Lacerto-roko,” dicis Stone. “Me venos tam rapide kam ca korvo-manjajo adportos me.” Il dicis a la proskriptito precize quale atingar Kupra-klosho-voyo, e la tereno cirkum Lacerto-roko. Tabor konsentis per kapsigno e Fardo adavane

kuregis. Kande Sonny tandem vidis la serchata furgono-voyo, Harry e sua kavalo esis nevidebla e ne-audebla.

De la monto-flanko Sonny povis surveyar plura milii di la streta e tordita voyo, ed il anke povis vidar la pinto di Lacerto-roko ultre la plura forestizita kolini intervenanta. Il komencis esar kurioza kad il arivabis en bona tempo kande il vidis veturo movante quale nigra koleoptero jus sub il. Ol esis kamiono flankumizita da du viri sur kavali.

Fardo irante per rigida gambi alonge l'eskarpa precipisi en nubo de polvo, la proskriptito atingis la voyo ante un minuto. Dume, la kamiono avancabis plusa duacent metri, e Sonny persequis, rapide rajuntis ol.

“Saluto!” il klamis ed agitis sua Stetson. “Haltez!”

Sonny rikonocis—kande il vidis ke la gardisti turnas su ed extensas manui por lia pafili—ke il riskas esar pafata ante explikar. Ma ta hazardo eventez, ed il kavalkis vers la haltigita kamiono kun la manui levita kelke plu alte kam la shultri.

“Vu ne irez plu avane, sioro Greene!” il klamis.

La pezoza viro sur la benko di la kamiono hastoze pedfrapabis kovrilo adsuper la valizo ye sua pedi. Nun ilua ronda e rozea

vizajo blankeskis rikonocante la yunulo sur la makulizita kavalo.

“Pafez lu, McDowel! Jones! Pafez! Lu es Tabor, me dicas!” La voco di Greene havis brametanta ed histeriala tonon. “Ne lasez ke lu plu proxime venez! Pro quo vi homi ne pafas?”

Ma la du robusta gardisti, vidante ke la manui di la nov-venanto esas vakua, e decidante ke il venas sole, ne movis por komencar kombato.

AGITATE, GREENE NEGLIJABIS SUA KAVALI e la veturo mi-turnesis en la voyo. La bankmagnato movis un manuo vers sua hanchoposho, lore altre pensis—probable rimemoris ula pafo-demonstro vidita en la kontoro di la guvernisto, nur kelka dii ante lore!

“Vu esos spoliata, forsan ocidata—” Sonny avertante paroleskis.

“Jones! McDowel! Ka vi audas?” bramis Lorenzo Greene. “Pro quo vi ne *agas* ante ke la bandacho di Tabor arivos? Me suspektis ke lu projetas ulo kande me vidis lu flananta en la Komercale Banko. Lu exploris la Banko—e nun lu volas kaptar *me!*”

“Tacez, Greene, e lasez me parolar,” Sonny abrupte dicis, e la kuglo-cikatro en ilua vango esis tro profunda por esar fosato. Ilua blua okuli esis koldega. Ta obeza e tremanta milioniero esis la homo qua opinionas ke dek-e-kin yari esas tro lejera kondamno a karcero!

Per tam kelka vorti kam posible, Tabor rekte pozis la stando avan Greene e sua gardisti. Pos explikir quale Trotman, la fidita bank-direktisto, projetis la spolio e kidnapo, Lorenzo Greene snortis pro repugno e nekredemeso. Ma la vorti di Tabor adminime konvinkis McDowel e Jones.

“To quon lu dicas sonas juste, patrono,” Jones base dicis. “Altrakaze, quale Tabor savus l’exakta quanto quan tu portas—quaradekamil kontanta?”

Greene tresayis. “Tabor ulmaniere dupigas. Atencez lu—atencez lua manui, homi! E gardez ni kontre altra banditi quin lu celis proxime!” Ilua voco febleskis kande la tota signifikio di la komenturo da Jones frapis il. “To es, tamen, stranja. Nur Trotman e vi gardisti savas to quo esas en la valizo. Ma me ne pensas—”

“No, vu ya ne pensas,” Sonny kurte konkordis. “Ma yen, venas mea amiko

Harry Stone, e vu forsan kredos *lu*. Stone esas bov-farmisto hike, do ne pafez *lu*.”

Harry arivis sur sua kavalo ante du minuti, e kande il konfirmis la naraco di Greene pri la komploto di Lashly e Trotman, Greene subite konvinkesis.

“Ek mea voyo, rapide, e lassez ke me turnez la kamiono!” il nerveze kriachis. “Me iros al urbeto! L’ushero—”

“Vu sendis l’ushero kontre *me*,” Sonny rimemorigis da il, “e me supozas ke *lu* ankore serchas me. Omnakaze, se vua du gardisti volas, ni kombatos la bandacho di Lashly, e surprizo agos kontre li. Esas nur kin de li. Semblas a me, ke es bona tempo trancar la kapi di ta krotali.”

“Yunulo, me opinionas ke tu es justa,” McDowel konkordis, e Jones ekis lo. “Ni kombatez.”

“Me ne avaniros plusa inch-o!” trepidante dicis Lorenzo Greene. “Vi altra povas avancer ed esar pafite pecetigita, ma me restos hike.” E prenante sua prezoza valizo, il sorgeme decensis de la veturo e reptis aden cedro-kopso apud la voyo. “Me esos hike kande vi rivenos—se irgu de vi *ya* rivenos,” il jemis.

Sonny Tabor ne celis sua gutur-rido. “Me livos mea kavalo hike por gardar vu,

Greene,” il dicis dum pazar ek l’estribi. “Harry, metez la chapelo e redingoto di Greene e guvernez la kamiono. Me sternos me komfortoze en la dopajo. Un de vi jetez ta kovrilo adsur me. *’Sta bueno!*†† Nun ni irez.”

MIN KAM DU MILII MANKIS til Lacerto-roko, e la kamiono havanta flava roti, kun l’eskorto de du kavalkeri, pasis ol nek tro lente nek tro rapide por suspektigar on. Harry Stone traktis la ledra reini, ed en la nigra redingoto e chapelo il facile aspektis quale Greene ye ula disto. Pro la sugesto di Sonny, Jones e McDowel kavalkis tre proxim la veturo, altra-latere del embusko. Ta du viri esabis selektita por morto, e la proskriptito volis protektar li tam bone kam posible. Ma il savis ke il darfas fidar a la du por bone kombatar; la milioniero di Phoenix esis saja pri engajar tala viri kom protekteri.

“Ni mustas pafar por mortigar saminstante li aparos,” Sonny dicis. “Se ni vartos til ke *li* montros sua intenco, ni falios. Ni ja savas lia intenco.”

“Ni varmigos la mondo por ta friponi,” McDowel solene dicis.

†† Esez bona!

En la dopajo di la kamiono Sonny aranĝis la kovrilo por ke ol esez instante forĵetita. Il havis sat multa spaco por vidar adextere, e dum ke la kamiono proximeskis a la nereakta e derodita lava-turmo nomizita Lacerto-roko, ilua nervi tenseskis. Ne tro longatempe lore!

“Me vidas nulo, Sonny,” murmuris Harry Stone. “Ka tu es certe ke hike—”

“Esez certa, *amigo*—me ĵus vidis l’oreli di kavalo e la supraĵo di chapelo,” la proskriptito replikis.

Apud Lacerto-roko esis neprofunda ravineto qua venis a la voyo, arbusto-kopso qua celis ol, e quale la proskriptito ekspektabis, de ca naturala embusko venis la atako.

La branchi violentoze agitesis dum ke du kavalkanti bruisoze ekiris la celo-loko por sizar la du kamiono-kavali ye la kapi. Li esis Fernandez e Tranchita Nazo Kay, laborante per l’experteso qua venas nur pro longa praktiko. Preske saminstante Pumpo-mancho Pressler e Nigra Sarko asaltis, brandisante ektirita revolveri e klamante, “Levez la manui!” Dop ta duesma duo kavalkis Bovulo Travis sur kavalego. Tenita en ilua granda reda manui esis .30-30 karabino.

“Bone, viri!” Sonny kantis dum forjetar la kovrilo, e pafis per amba sua Colt-i. “Donez a li!”

Vidante Tabor, l’astonata grupacho hezitis, nekapabla kredar lia okuli. Ma esis tro tarda por retroirar, mem se li ton volus. Kugli sisis e zumis quale iracigita hornisi!

“Donez a ni la pekunio!” Pressler mujis dum ke sua kavalo preske kolizionis kun la kamiono. Il donesis ulo—ma ne la valizo plena de dolari! Harry Stone rekte pafis, e la kuglo frapis Pressler sub la mentono ed ekiris la supraĵo di ilua kapo. La mortintulo glitis adavane super la pomelo, lore laxe falis an la roto di la kamiono.

La gardisti Jones e McDowel anke pafis per sua mujanta revolveri, e lore la pafisti di la 7Y7 komprenis ke li ulmaniere hororinde falias. Yen nula senpova milioniero, ma Stone di la Cirklo-X, e Tabor, la maxim habila pafisto en Arizona! E Jones e McDowel anke forte kombatis!

Tabor, ankore sur la genui ed hastante staceskante, apuntis la blua fusiltubi di sua pafili vers Nigra Sarko. Li ekjetis fairo-sprici, e Sarko, dum pafar ye Sonny, esis ruinita da plombo super la zono. Il retroe jetesis super la grupo di sua kavalo quale se forvishita da nevidebla manuo. E la lasta

kuglo di Sarko frolis la supraĵo de la ŝultro de Tabor.

“McDowel es mortigita, me supozas,” esis la pensajo de Sonny vidanta ke la robusta gardisto falas kun sia kavalo.

Eventi tante rapide pasis ke tempo semblis haltar quaze en koshmaro; viri e kavali movis per absurde lenta movi. Un de la kavali de la 7Y7 anke mortigesis da hazarda kuglo, e Pancho Fernandez esis sur la tero, esforcis desintrikar su del estribi. Il ankore tenis sia pafilo, ed ol flagris vers la kamiono. Palii flugis ek la polstero de la benko dum faliar frapar Harry Stone nur per inch-i. Lore pafo de Jones finigis Fernandez; la Mexikiana saltante falis retroe trans la kadavro de sia kavalo.

La laboristestro de la 7Y7, Bovulo Travis, saltabis de sia kavalo por plu efikive uzar sia karabino. Il esis plu for kam l'altri, de cirkume triadek yardi, e Harry Stone pafis ye il ma faliis. Dume la atenco de Sonny turnesis a Tranchita Nazo Kay, qua livabis la kapi de la kamiono-kavali por asaltar l'okupanti de la veturo.

La leda vizajo de Kay, senkorpa fantomo en la vortikanta polvero-fumo, esis distanta de ne plu kam la longeso de un brakio kande la sinistra .45-revolvero de Sonny

muĵis destrukto e morto. La vizajo di Kay semblis fluktuar, quale la vizajo di kadavro vidita tra aquo, lore desaparís en mem plu densa fumo-nubo. Sonny savis ke ol ne itere ri-aparos; Tranchita Nazo Kay havas kuglo en la cerebro.

Bovulo Travis pumpis sua .30-30 karabino per frenezioza desespéro, tenis ol ye la hanko, ma il sakrifikis precizeso por blinda pafo-povo qua til lore facabis nulo eĉepte frakasari la rot-radii e ŝokari spliti ek la kamiono. Ed ilua sablo-horloĵo exhaustis sua sablo! E Sonny Tabor e Harry Stone nun favoris per lia atenco la laboristestro di la 7Y7, e de la kamiono venis poniardaganta flamo-lanci. Spricegi de polvo e gravio plaudis ĉirkaŭ Travis. La du kavali luktis pro pavoro, e Stone esforcis tenari li per un manuo, qua desfaciligis apunti. Ilua pafi faliis.

Lia sequanta salveo atingis la skopoplako. Bovulo Travis squatabis, ma subite saltis a sia pedi, o por retreti o por asalti, e kugli de Stone e Tabor frapis il staceskanta. Kun stranga klamo, Travis ĵiris, e li vidis polvo-nubi flugari ek ilua vesti. Dum instanto il bizare inklinis sur sia karabino, quale se ol esas grucho; lore il falis, e la lasta fripono esis finigita.

“Ka tu ... ka tu pafesis, Sonny?” Harry klamis, la voco dina ed alta pro eciteso.

“Tote ne. Ma me opinionas ke McDowel pafesis.”

La polvo e fumo lore disipis, e li audis la quietiganta voco di la robusta gardisto. “Ne me—me falis kande mea kavalo mortigesis, e me havas nur tordita pedo-kolo pro to. Ube es Jones?”

La kavalo di Jones, dementigita pro pavoro, portabis il cent yardi de la loko, ma l’animalo quieteskis pos ke la pafado cesis, e trotante rivenis. Stranje, Jones esis la nura homo di la grupo di Tabor qua serioze lezesis. Il ricevabis mala vunduro en la kruro, e li flegis il e pozis il en la dopajo di la kamiono.

“Nun ni irez e renkontrez Lorenzo.” Sonny severe gutur-ridis. “Lu probable volas traktar ul afero en sua propra banko en Monto-fonti. Ni havas ulo facar ibe, omnakaze.”

CHAPITRO IX.

Lashly inkasas.

EN LA KOMERCALA BANKO la tempo venis por klozar; la lasta klienti irabis, e la multe laboranta kasisti kontrolis dop la bronza gicheto. An sua skribtablo en la basa ligna barilo, la direktisto Trottman nelaute konversis kun Bill Lashly, qua retroe inklinis su sur sua sidilo, un elegante botizita gambo krucumata an l'altra genuo. Li amba fumagis sigari.

“Tam balde kam tu klozos, ni iros al kazino e pleos per karti,” Lashly dicis.

L'okuli di Trottman avide aspektis. “Bonege.” Lore sua mieno kelke chanjis. “Me ya havis desfortuno. Pro to,” il preske susuris, “pro to me tante multe mankas.”

“Tua fortuneo chanjas, Trottman.” Lashly gutur-ridis. “E chanjas multe. Ante nun,” il nelaute dicis, “tua gros amiko es sekura che me, kun lua valizo plena de *dinero*. Ni

stacas sur la mondo, tu e me. Mea alibio es bona—me esis hike en l'urbeto dum la tota dio. E l'ushero"—il ridis—"ankore serchas Tabor."

La flav-pala vizajo di la bank-direktisto obskureskis pro rankoro. "Do il celate askoltis exter tua fenestro dum ke me esis ibe, ka yes? Me deziras ke tu mortigabis lu! Ka ne es risikoza, retenante lu kom kaptito?"

Lashly sukusis la cindri de sua sigaro. "Tam balde kam la afero oblivieskos, me donos lu al autoritatozi—mortinta—por la premio," il konfidencis. "Lu ne es quale reputata, ca Tabor. Ne mem tam danjeroza kam kuniklo!"

"Kande tu finos pri Stone?" Trottman nelaute questionis. "Vartez—ni diskutos to plu tarde; yen la kasisti."

L'employati di la banko esis pronta ekirar. Li metis sua chapeli, ed un de li esis ye la avana pordo, tirante adsube la verda storo markizita "Klozita". Ma semblis esar ula desfacileso pri facar lo. La kasisto havanta trista vizajo esforcis haltigar tarda kliento de enirar.

"Me regretas, ma la banko es klozita," Lashly e Trottman audis ke il dicis. Lore li vidis ke il pulsas la vitrizita pordo—vane—

dum ke vigoroza yunulo enpulsas sua shultri. Semblis esar plura altra homi dop il.

“La banko es forsan klozita,” lente dicis familiara voco, “ma restas sat multa tempo por kombato. Nun stacez for mea voyo, homo. Se es dopa pordo, vi kleriki uzez ol.”

“Furto!” kriachis timigita kasisto. “Helpo!”

“No. Ni nur volas konversar kun la direktisto—e Lashly,” dicis Sonny Tabor.

Il enflanis, e dop il venis Harry Stone e Lorenzo Greene.

“Pri ta prestajo, sioro Trottman, ka yes?” Harry ironioze questionis.

Bill Lashly e Trottman rigide restis en lia sidili quaze petrigita. La kasisti aceptabis la konsilo di Tabor e fugabis addope.

Lorenzo Greene lore esis multe plu impresiva figuro kam dum celir su en la cedri kun sua valizo. Ilua masiva vizajo esis reda pro rankoro, ed il agitis grosa pugno avan la vizajo di Trottman.

“Me savas omno, Trottman!” il kriis. “Danko a ... mm ... a sioro Tabor, me deskovris omno. Kaso-manko, ka ne? E tu projetis ke me esez spoliata, kidnapata, forsan ocidata! Ho, me ... me—”

“Adlatere, Greene! Atencez!” Sonny aboyis, ed ilua manui levis la revolveri per

la belega precizeso di mashino. “Do tu volas inkasar, ka ne, Lashly?”

La posedanto di la 7Y7 saltante staceskabis, renversante la sidilo, ed ilua revolveri havanta perla krosi esis ja en ilua manui.

“Yes, damnez tu, me ya inkasos la premio por tu, mortiganto!” il klamis.

Lorenzo Greene faligis sua obeza korpo adsube dop la barilo per ajilesa surprizanta por viro havanta sua grandeso e larjeso. Harry Stone nur movis adlatere. Ilua propra pafilo restis en la pistoluyo; il lernabis fidar a sua ridetanta amiko havanta blua okuli.

Sonny pafis unfoye. De la blu-nigra fusiltubo di sua dextra pafilo dina flamo-javelino spricis, sequata da lente vorticanta serpento ek blua fumo. La kuglo frolis la supraĵo di la skribtablo e perforis Bill Lashly ye loko tam granda kam dolaro, exakte meze sub la sternumo, quan la mediki nomizas la *solar plexus*.

La pafili di la domenestro vane jiris en ilua manui, pose klakis an la pavimento.

Ne mortinta, ma mortanta, tote koncianta, ma omna nervo sensentigita e paralizita, Lashly shancelis dum longa e nauzeiganta instanto, pose spirale falis a la pavimento.

“E tu *ne* facos lo!” Sonny kurte klamis dum ke la blanka e tremanta Trotman sizis mikrega fialo ek tirkesto ed esforcis levar ol a sua labii. “Sizis lu, Harry!”

SUOCIDO PER CIANIDO FALIIGITE, la bank-direktisto sinkis adsur sua skribtablo, histerioze ploregante.

“Me konfesos omno,” il jemis. “Me projetis ol kun Lashly. Me debis ed irabus al karcero omnakaze, Greene, e me pensis—”

“Nu, tu nun havos multa tempo por pensar, Trotman!” bramis Lorenzo Greene. “Me atencos ke tu kondamnesos por vivo pro to quon tu facis. Me savas ke—”

Sonny dolce interruptis il. “Semblas ke me audis ulo simila de vu, sioro Greene,” il dicis. “Pro quo tu ne kondamnas lu nur a, nu, dek-e-kin yari?”

Greene fole aspektis, rimemorante ula kunveno en la kontoro di la guvernisto. Il balbutis e trovis nula vorti, ma tandem sucesis barbuliar ulo por exkuzar su.

“Me ... me misjudikis tu, Tabor. Me supozas ke me ne es l’unesma homo facar lo. Se me povas facar irgo por tu—”

“Tu povas facar lo por mea amiko Harry Stone,” la proskriptito bruske dicis. “Lu havas domeno e lu bezonas kinamil dolari

por provizar ol per bovi. Ka vu prestos a lu la *dinero*?”

“Joyoze,” dicis Lorenzo Greene. E lu pluse dicis to quo astonesus la financala medio di Phoenix. “Me prestos to quon lu bezonas—sen interesto.”

Sonny duktis l’agreable astonata Harry ek la banko ed aden la strado, nam il audis bruiso plura stradi de il e konjektis to quo ol esas. Fardo vartis ye la kavalo-posto e la voyajo-tempo venas sen ajorno! Polvo-nubo kreata da multa hufi rapide proximeskas.

“Ushero Fuller e sua grupo rivenas al urbeto.” Tabor ridetis. “To signifikas ke mea adio mustas esar rapide facita. Adio, Harry, e me deziras fortune a tu!” Il rapide presis la manuo e saltis adsur la makulizita kavalo.

“*Hasta la vista!*” Harry Stone rauke dicis, ed esforcis celar la humideso en sua okuli per aklamar ed agitar sua Stetson-chapelo dum ka la kavaletto di la proskriptito kuregis de la posto.

Ed alonge la chefa strado di Monto-fonti, avan la persequanta bando e sempre plu devancante per omna salto, hastis Sonny Tabor e Fardo. Li esis itere fugeri, chasata quale sovaja bestii.

Ma li havas omna Arizona en qua celar
su, e vivo ipsa, harda e pura, por qua luktar
til la fino.

FINO.



Post Photo Studio
Orange, Calif.

PAUL S. POWERS
Author of
"Doc Dillahay"
(Macmillan)